

【一碗甜菜卵花湯】梁愛珠原作

十月冬禾割忒了後，天時漸漸轉秋咧，天氣也涼爽咧，阿姆个菜園肚，種當多菜頭、大菜、大心菜、包心白、結頭菜、高麗菜。這兜菜一看就知收成後，準備年下揸去街路賣，有伸个斯晒乾入盞園起來。這兜事全全係 兜細人仔愛 做个。菜園肚角頭角尾脣頭，看得著另外有種「甜菜」，也有人講係香甜菜、皇帝菜，有一息仔清淡菊花香。這甜菜無論係用來煮湯、焗過滴兜油搵醬、單淨炒，斯非常清甜爽口，做得講係客家人最愛个風味。

菜園肚一大遍个菜頭、大菜好摘咧，大人細子背痠痠、頭磬磬仔一頭一頭擲，做到腰骨痠軟，一半下就想企直來伸一下腰骨。趕日頭花出來，菜頭洗淨剝坭禾埕晒，大菜吊在竹篙頂晒，臨暗仔收轉來用大醃缸滷鹹後，用腳來踩，就變鹹菜，續等過晒就係鹹菜乾、菜脯乾。一雙手一雙腳，因為分鹽水浸忒久，十隻手指頭膠腳腫，長下必到血漬漬，也愛刻耐仔忍等痛 手做，大人吩咐个事毋敢推，總講爺哀希望屋下過隻好年。

有一年冬下頭，堵著寒流來，濕漉漉个天時，這粗重个事一年過一年，儕儕做到腰掛背吊， 毋堵好嘎冷著，身體一陣寒一

陣熱，作燒咧，人懶 仔。該時莊下時行家家屋屋廳下、壁頂都有吊等一種成藥，安到「家庭平安良藥」个藥袋仔，袋肚有傷風感冒个、顧胃腸个、顧筋骨痠軟个、著傷膏个、貼个藥膏項項有，放藥包仔个人，逐隻月定時會來換添藥仔，一隻月算數一擺。阿姆遽遽尋出一包退燒藥分 食，過幾下日燒還係無退，燒到會燒人，歸身軟怠怠仔，該量時生活清苦，細病無出莊去街路分先生看。

阿姆心肝肚掛吊到無結無煞，記得該日臨暗仔發風落水，佢跔工著等水衣去菜園肚割甜菜轉來，煮一碗燒燒个「甜菜卵花湯」兜在眠床脣，扶等 跔起來憑¹等佢个膺身，一湯匙一湯匙舀分 食該時，有一種清甜个味緒，過無幾久黏時潑大汗，燒漸漸仔就退忒咧， 知阿姆種个甜菜膠雞卵係準備愛賣个，平常時毋盼得食，這下為著子女个身體愛趕緊復原，爺哀惜子連心，仰般就有辦法。

想起頭擺農業時代，細人仔發病時節，爺哀舂頭磕額尋草藥材，病症無起色時，正會去街路尋先生看，爺哀就背囊背等三步做兩步趕緊行，窮苦到連一輛腳踏車就無。一碗簡單个「甜菜卵花湯」，心肝肚就張唸唸个愛。難怪「甜菜」也有人講係皇帝菜。子女著病時有爺哀个服侍，佢俚做子女个有影就像細皇帝樣。

¹ 憑：音 pen⁺；靠著。

【耕種人个子女】陳米英原作

頭擺个生活，六月天公會嘍薤菜就愛停動，正經係日日做到兩頭烏。

記得還細時節，阿爸食个頭路係鐵路局个道班工，也就係擎鐵鎚做鐵路个工人，逐日屋下先做一脩事正去上班，所以阿爸个手腳盡煞，不管做麼个事情都盡有煞氣，兜細人仔，乜無人敢推懶，尤其係緊工時節堵著風搓天，一時間喊無師父，屋下又無人好換工，乜喊無工人，全部就搶等愛收成自家个禾穀，若係慢著一日半日，該橫到歸坪歸田个禾仔珍等就生芽，一來無法度用機器收割，二來生芽个穀又賣無價，大半年來个辛苦就分風搓搥到淨淨，正經係膝頭就會出目汁。該量時个莊下人較老實，無像這下个耕田儕較有常識，會申請政府補助，在个印象中，長下聽著阿爸、阿姆道嘆，耕田人看天食飯，天係無檢你食，做死乜無人賠，斷真有影哦，難怪會有「人害人肥卒卒，天害人一把骨」个俗諺，這係天災，無奈何，偲俚還係愛認命、順應天理。

想起頭擺，屋下个細人仔各有各个事愛做，細俖仔愛掌牛、割草；細妹仔愛掃地泥、洗衫褲、撿樵、晒穀。講著晒穀，

緊工時節家家屋屋都愛自家晒，就算請人乜無人有閒手啊！屋下座大个阿姊全部嫁忒咧，伸著這講好聽安到「滿女」个，就愛揸起晒穀个擔頭，想著該甲零地个穀，全部愛用祛齊，一祛齊一祛齊硬掃到淨，正經係手工个哦！這下想起該咬人个日頭，歸身汗流脈落，做到出油个樣仔，發夢都還會驚哦！毋過牙根齧等又乜過來咧。

這下無共樣咧，在田肚，機器行過去就搥到淨淨俐俐、好勢好勢，黏時載去農會交濕穀換現金，實在有方便。頭擺偲俚兜細人仔毋使爺哀講，該做个事情有頭有尾做到好好，讀書人讀書寫字係暗晡頭食飽夜，大人在天時坪寮涼泡茶該時，偲俚在廳下抑係灶下个桌頂寫，從來乜毋識無寫忒，第二朝晨還愛比人較早到學校。想起讀小學該駁仔，係堵著落水天，赤腳嫲踏，一領水衣布抵等，半行半走去學校，該無鞋好著个日仔，係毋堵好踩到蟲蟻，斯走投無路驚到半生死，回想起來，有時還會打激顛呢？在這時代有時講分學生仔聽，無人會相信哦！

時代一直在該進步，生活乜一直改善，電子、電訊取代手工个日仔，頭擺艱難困苦食著毋好个日仔，練就這下賺食个本等，雖然賺無多，但係最起碼个生活，毋使撙子女伸手乜過得日仔得，永遠保留等客家人勤儉堅耐个精神。

108 年全國語文競賽客家語朗讀文章國中組（海陸腔）

編號 03 號

【屋下該扇壁】邱坤玉原作

從細戴竹籬茅屋，冷天勉強做得防風，熱天做得抵涼遮水！

阿爸在日本人個會社肚，領著種甘蔗、改菜園、結石腳個頭路。當時分著一支鑊頭、一支擔竿膠兩隻畚箕，就恁樣日合夜無閒做到兩頭烏。正式難耐，日仔無恁簡單過——逐日就恁認真做，但係領該毋成錢，過該食番薯籤摻米粒個日仔。生活都過毋得下去咧，哪有辦法整出體面個屋場？好得還起得起一間蔗葉搭個茅屋，做得起一座土磚個灶頭，全家大細總算有地方好跔，總算毋會打露！

茅屋個壁係用濫泥敷竹籬起起來個，難免會有必縫。到冷天個時節冷風在必縫尖落來，冷颼颼仔實在冷到會死！到熱天個時節，該就鬆爽哪，望毋得佢鑽落屋肚來。

屋下該扇壁正對大門，係屋肚最闊個壁，乜係兜屋下最鬧熱個壁。該壁當像學校個公佈欄，掛等一隻日本製個掛鐘，還有阿爸摻阿媽結婚個相片，阿爸著等西裝摻阿媽等西式個白紗羅帕，阿媽明顯矮阿爸兩隻頭那，兩儕牽等手盡靚。

該扇壁乜係兜屋下最光榮個壁。先用剪開個肥料袋貼等做背景，頂高過貼等大姊做洋裁時，靚靚個日本妹相片；有生著相貌堂堂個大哥，摻野狼 125 共下翕個相片；有二哥去成功嶺受訓剃光頭個相片；還有細姊在學校學煮菜時個笑容，生活中個紀錄全部貼在該扇壁町。

最湛個係兄弟姊妹摻自家領轉來個獎狀，貼做一排一排，該係最光榮個事，大家就恁樣拚命在該領獎。該一排排個獎狀本旦係打拚來個光榮，告知阿媽講：「欸！用獎狀貼等，壁較毋會過風哪！」哈哈！害兜分阿媽撩到目汁都會跌下來，正經係窮苦人家個辛酸啊。

當中有一張獎狀對一生影響最大。係先生來屋下家庭訪問過後，校長先生頒個「環境衛生獎」，先生講雖然兜戴個係茅屋，毋過地泥掃到金金、茶杯茶盤搓到白白、壁頂獎狀排到齊齊，還有屋下頭前、左右兩百公尺都掃到淨淨，值得表揚。

在該時代，大自家戴個屋全係茅屋，該確實係窮苦人個樣仔，空窿空殼，斯伸著壁頂貼等個「獎狀」，該係一條生活下去個希望。係鼓勵窮苦人家個子女揸忒鑊頭、齧等牙根去讀書，讀出希望，爭取將來有機會坐橫桌，正有出頭天個機會。

三年水流東，三年水流西，跔等時間個推，運勢乜會變化。戴三十零年個茅屋，阿爸時來運轉興旺起來，就起起莊肚第一間洋樓！

